

Իր հերթին, Հ. Հ. Պատուիրակութիւնը մեկնում էր իրական փաստից. Հայաստանի Հանրապետութեան գոյութիւնը իրողութիւն է, Հայաստանում ապրում է մէկ միլիոն ժողովուրդ. Երևանում կայ Սորհրդարան, կառավարութիւն, բանակ. երկիրը հետզհետէ կազմակերպւում է պետականօրէն: Մինչդեռ, Թիւրքահայաստանը ամայի է. ո՛չ ժողովուրդ կայ, ո՛չ կառավարութիւն: Հեռակարար, անհրաժեշտ է ազգային բոլոր ուժերը կենտրոնացնել Հայաստանի Հանրապետութեան վրա, իբրև հայկական պետութեան կորիզի, և հայկական հարցի լուծումը դնել Հայաստանի երկու հատածների միացման ձևով:

Կողմերը խօսում էին տարբեր լեզուներով և իրար չէին հասկանում: Այս տրամադրութիւնից օգտւում էին չարամիտ մարդիկ՝ թունաւորելու համար գաղութահայ ազգայինների միտքը նրանով, որ, իբր թէ, դաշնակցականներն են միայն այդպէս մտածողները, դաշնակցական պարագլուխները, որոնք «Արարատեան Հանրապետութիւնը» գործիք են դարձրել իրենց կուսակցական նպատակների, ձգտում են բռնազրաւել Թիւրքահայաստանը*), խլել Պօղոս փաշա Նուպարից ազգային գործերի ղեկավարութիւնը և այլն: Քաղաքական ընդհանուր տեսակէտների տարբերութիւնը, կուսակցական նեղմտութիւնը և անձնական նախանձն ու քէնը Փարիզում առաջացրին խեղդիչ մթնոլորտ, որի թունաւոր հոսանքները հետզհետէ սկսեցին հասնել և Երևան:

Մայիս 28-ի յայտարարութիւնը բոլորովին անսպասելի էր Ազգ. Պատուիրակութեան համար: Պօղոս Նուպարն ու իր դործակիցները սկզբունքով դէմ չէին նման քայլի: Ընդհակառակը, ինչպէս տեսանք, դեռ նոյեմբ. 30-ին նրանք յայտարարել էին «ամբողջական Հայաստանի անկախութիւնը»: Եւ այժմ էլ գործում էին այդ ուղղութեամբ, բայց նրանց գայրացնողը այն էր, որ յայտարարութիւն անողը Երևանն էր և ոչ իրենք, երկրորդ՝ որ Երևանի կառավարութիւնը ինքզինքը հռչակում էր միացեալ Հայաստանի կառավարութիւն, այն ինչ բոլոր մարդկային և աստուածային օրէնքներով միացեալ Հայաստանի կառավարութիւնը պէտք է կազմէր Փարիզում և անպայման Պօղոս փաշա Նուպարի նախադասութեան տակ:

*) Արժէ արձանագրել մի պատմութիւն, որ անում էր հանգուցեալ Արմէն Գարօն: Ազգ. Համադումարի ժամանակ, երբ քննուում էր Թիւրքահայկական դաւառների գրաւման հարցը, Արմէն Գարօն ասում է, թէ շուտով Հայաստանի կառավարութիւնը կը գրաւէ Կրդրումը:

— Ի՞նչպէս թէ կը գրաւէ, զարմանում է Պօղոս Նուպարը՝ յանկարծակիի եկած:

— Հէնց այնպէս, զօրք կուղարկէ ու կը գրաւէ, պատասխանում է Արմէն Գարօն: Ի՞մ եղբայրն էլ հայկական բանակում է. յոյս ունեմ առաջին իրդրում մանողներից մէկն էլ նա կը լինի:

— Mais c'est une occupation! (բայց այդ բռնագրաւում է) վրդովւած բացականչում է փաշան:

Եւ տեսնելով Արմէն Գարօի շարած դէմքը՝ ձեռքը զարնում է սեղանին ու —

— Այո՛, այո՛, բռնազրաւում է այդ, և ես կը բողոքեմ զրա դէմ... Ես կը բողոքեմ՝ մ...

Հայաստանի գորքը պիտի գրաւէր իրգրումը, և Ազգ. Պատուիրակութեան նախագահը սպառնում էր բողոքել...